



Arkivnr: 2016/3291-4

Saksbehandlar: Bjørg Larsen, Tore Andersen, Britt Karen Spjeld

Saksframlegg

Saksgang

Utval	Saknr.	Møtedato
Utval for kultur, idrett og regional utvikling		08.06.2016

Fordeling av fylkeskommunalt investeringstilskot 2016

Samandrag

I handlingsprogrammet til Regional Kulturplan for Hordaland (2015-2025) går det fram at Hordaland fylkeskommune støttar utbygging av idrettsanlegg som har regional og nasjonal verdi. Det er for 2016 løyvd kr 2,5 mill. til investeringstilskot til store og kostnadskrevjande idrettsanlegg, der ein skal arrangere store nasjonale og internasjonale seniormeisterskap.

Kriteria sett for ordninga vart spissa når fordelingssummen vart redusert frå kr 4 mill til 2.5 mill i 2015. Dette har ført til at fleire aktuelle søkarar ikkje har vore kvalifisert for ordninga. Fylkesrådmannen vil leggja fram sak til Utval for kultur, idrett og regional utvikling om nye retningslinjer for ordninga i november 2016. Desse bør sjåast i samanheng med retningslinjer for fylkeskommunal støtte til festivalar og store kultur og idrettsarrangement i Hordaland som skal utarbeidast. Dette tiltaket er forankra i Regional kulturplan.

Det er 3 søkjarar for 2016.

Forslag til vedtak

Utval for kultur, idrett og regional utvikling fordeler løyvinga på kr 2,5 mill. i investeringstilskot til idrettsanlegg av regional og nasjonal verdi for 2016 slik:

Bergen kommune	Helleren bad- og symjeanlegg	kr 2 500 000
Bergen kommune	Bergen Tennisklubb	kr 0
Stord kommune	Stord Hestesportssenter	kr 0

Løyvinga skal førast over budsjettpost 10.400.410.09.14700 fylkeskommunalt investeringstilskot.

Rune Haugsdal
fylkesrådmann

Per Morten Ekerhovd
fylkesdirektør, kultur, idrett

Vedlegg: Retningslinjer for tilskotsordninga investeringstilskot til idrettsanlegg med regional og nasjonal verdi

Saksframlegget er godkjent elektronisk og har derfor inga underskrift.

Fylkesrådmannen, 18.05.2016

På fylkesbudsjettet for 2016 og i økonomiplanen 2016-19 er det ført opp løyvingar til investeringstilskot til idrettsanlegg av regional og nasjonal verdi. Hordaland fylkeskommune sitt investeringstilskot skal medverke til at regionen utviklar kostnadskrevjande idrettsanlegg som har regional og nasjonal verdi, der ein kan arrangere nasjonale og internasjonale meisterskap for seniorar. Anlegga er også særskilt viktige som treningsarena for toppidrettsutøvarar i fylket. Ordninga har søknadsfrist 15. mars. Ordninga med fylkeskommunalt investeringstilskot har eksistert sidan 1993. Fylkesidrettsanlegg og regionale anlegg som tidlegare har fått fylkeskommunalt investeringstilskot til idrettsanlegg i Hordaland er:

Anlegg	Kommune	Totalt tildeling
Askøy seilforening Seglsportsanlegg Hanøytangen	Askøy	3 300 000
Ravnanger Idrettspark friidrettsanlegg	Askøy	833 000
Bergen Tennisklubb	Bergen	2 333 000
Brann stadion	Bergen	2 000 000
Friidrettsanlegg Fana stadion	Bergen	2 500 000
Haukelandshallen	Bergen	1 000 000
Helleren hovudanlegg svømming og stup (AdO Arena)	Bergen	4 834 000
Klatrevegg Bergenshallen	Bergen	1 700 000
Kunstisbane Slåtthaug	Bergen	2 300 000
Leikvang friidrettshall	Bergen	4 000 000
Motorsportsenter Eikås	Bergen	1 500 000
Vestkanten Curling-/Ishall	Bergen	5 000 000
Vestlandshallen	Bergen	10 000 000
Bømlo Motorsportanlegg	Bømlo	1 100 000
Sotra Arena	Fjell	1 000 000
Hustredalen motorcross	Stord	1 000 000
Stord Hestesportsenter	Stord	800 000
Turnanlegg Vikahaugane	Stord	2 000 000
Vikahaugane isbane	Stord	3 000 000
Sveio golfbane	Sveio	2 000 000
Tysnes Idrettshall	Tysnes	1 000 000
Freestyleanlegg Myrkdalen	Voss	3 300 000
Hoppbakke Bavallen	Voss	350 000
Roanlegg Vangsvatnet	Voss	900 000
Voss Ski- og tursenter Skutle langrenn/skiskytteranlegg	Voss	3 500 000
Skytebane Skjerve/Bjørke	Voss	3 000 000
Snøkanonanlegg Bavallen	Voss	2 500 000
Varmestove Bavallen	Voss	1 000 000
Totalt		67 750 000

Behovet for større idrettsanlegg er stort, og fylkeskommunen, gjennom Regional kulturplan for Hordaland 2015-25, legg opp til å støtte utbygging av idrettsanlegg som har regional og nasjonal verdi. Det er for 2016 løyvd kr 2,5 mill. til investeringstilskot til store og kostnadskrevjande idrettsanlegg, der ein skal arrangere store nasjonale og internasjonale meisterskap for seniorar.

Kriteria sett for ordninga vart spissa når fordelingssummen vart redusert frå kr 4 mill til 2.5 mill i 2015.

Dette har ført til at fleire aktuelle søkarar ikkje har vore kvalifisert for ordninga. Fylkesrådmannen vil leggja fram sak til Utval for kultur, idrett og regional utvikling om nye retningslinjer for ordninga i november 2016. Desse bør sjåast i samanheng med retningslinjer for fylkeskommunal støtte til festivalar og store kultur og idrettsarrangement i Hordaland som skal utarbeidast. Dette tiltaket er forankra i Regional kulturplan.

Vilkår for støtte

Hordaland fylkeskommune føreset tidleg dialog om utvikling av anlegget. Før tilsegn om fylkeskommunalt tilskot vert gjeve, er det ein føresetnad at det ligg føre ein godkjend spelemiddelsøknad og at anlegget er tildelt eit nasjonalt eller internasjonalt meisterskap. Søknad om investeringstilskot skal sendast via kommunen og innehalde skildring av anlegget med finansieringsplan og kostnadsoverslag. Anlegget det vert søkt om støtte til, skal vere forankra i ein kommunal plan for fysisk aktivitet, idrett og friluftsliv. Om anlegget er forankra i ein regional plan, styrkjer dette søknaden. Søknaden skal og innehalde ei vurdering av anlegget sin nasjonale verdi, med uttale frå respektivt særforbund. Om det vert søkt om investeringstilskot til eit anlegg med regional verdi som finst frå før i Hordaland, er det opp til søkjar å skildre kva som skil anlegget i høve til det/dei som eksisterer. Storleik på støtta vert vurdert i høve til godkjend kostnadssum på spelemiddelsøknaden og tilskot frå andre fylkeskommunale støtteordningar.

Hordaland idrettskrets er nytta som høyringsorgan. Det har kome inn 3 søknadar.

Vurdering

Helleren (AdO Arena) - Hovudanlegg for symjing og stup, Bergen kommune

Bergen kommune og Hordaland Fylkeskommune samarbeidde om prosjektet Amalie Skrams vidaregåande skule med idrettshall saman med nytt hovudanlegg for symjing og stup. Dette er eit anlegg som tek vare på toppidretten sine behov, samstundes som det er eit viktig bidrag til folkehelsearbeidet i Bergen. Bygget vart ferdig hausten 2014, og har status som hovudanlegg for symjing og stup i Noreg. Status som hovudanlegg inneber at anlegget skal tilfredstille det internasjonale symjeforbundet sine lisenskrav til å arrangere internasjonale arrangement for symjing og stup. Norges Svømmeforbund skal fortrinnsvis legge nasjonale og internasjonale arrangement i symjing, stup, undervannsrugby, vannpolo m.m. til Bergen. I AdO Arena blir det frå 2015 kvart år arrangert Bergen Swim festival - ein internasjonal symjekonkurranse.

Anlegget har fått tilsegn om kr 32,5 mill. frå Kulturdepartementet sitt anleggspolitiske program. I 2010 løyvde Hordaland fylkeskommune kr 10 mill. til dette anlegget frå fondsmidlar avsett i 2006/2007. I 2012/2013 løyvde Hordaland fylkeskommune kr 2,0 mill. i investeringstilskot, i 2014 vart det løyvd kr 2,0 mill. og i 2015 kr 834 000,-. Såleis er det totalt løyvd kr 14.834.000 til AdO Arena.

For 2016 er det 7 spelemiddelsøknadar knytt til anlegget for symjing og stup med ein godkjent søknadssum på kr 27,5 mill. Bergen kommune ber om ny vurdering av investeringstilskot frå Hordaland fylkeskommune, slik at fylkeskommunen sitt samla bidrag til prosjektet vert auka til minimum kr 21,25 mill. Total kostnad på anlegget er kr 1 062 500 000,-.

Fylkesrådmann tilrår å støtte søknad til hovudanlegget for symjing og stup med kr 2 500 000,- for 2016.

Bergen Tennisarena, Bergen kommune

Bergen Tennisarena vart bygd for å dekke behova både for bredde- og eliteidrett. Bygget vart ferdig hausten 2013. Det er eit av få innandørs tennisanlegg i Norge som kan arrangere dei aller største internasjonale tennisturneringar. I 2015 arrangerte dei NM i Tennis.

Dei har sendt inn same søknad som for 2015. Då fekk dei kr 833 000,- i investeringstilskot.

Fylkesrådmann tilrår ikkje å støtte søknaden i 2016, avdi Bergen Tennisarena ikkje er tildelt store nasjonale eller internasjonale stevner dette året.

Stord Hestesportsenter, Stord kommune

Stord Hestesportsenter har vore i full drift på Stord i to år. Senteret har 7 ulike anleggseiningar. Det er det einaste heilårsanlegget i Sunnhordland.

Stord Hestesportsenter ønskjer å kjøpe naboeigedomen med ridehall, utandørsbane, ovalbane, beite, lufttegardar, stall med plass til 11 hestar inne, ein del uteboksar, i tillegg til hus og leilegheit.

I år har Stord Hestesportsenter fått tildelt fire distriktsstemner i sprang og dressur. Her kjem det utøvarar frå Hordaland og Rogaland. Dei skal og arrangere ei stor jubileumsutstilling i år. På denne utstillinga vert det landsfinalar for fjordning- unghest. I tillegg skal dei ha finalen i kjøring på Vestlandet. For å kunne arrangere landsstevner i sprang og dressur må ein ha ein bane på 50x75m. Utebanen er i dag 40x60m. Siktemålet er å få tildelt landsstemne i 2017.

Det er sendt inn 2 spelemiddelsøknader på totalt kr 1,5 mill. Stord Hestesportsenter fekk i 2012 kr 4 mill. i programsatsingsmidlar frå Kulturdepartementet og kr 800 000,- i 2013 i fylkeskommunalt investeringstilskot.

Fylkesrådmann tilrår ikkje å støtte søknaden i 2016, avdi Stord Hestesportsenter i 2016 ikkje er tildelt store nasjonale eller internasjonale stevner for senior.